



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

04.03.2022թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի թիվ ՍՑ-ՆԳ-2022/75

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության 18.02.2022թ. թիվ 26/26-1/2912-2022 գրությամբ «ԷՍ ԸՆԴ ԷԼ ՏԵՔՍՏԻԼ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ աշխատանքի և սոցիալական հարցերի նախարարության (հետայսու նաև՝ Պատվիրատու) 11.02.2022թ. թիվ ՍՄ/ԿԲ-4/3498-2022 գրության հիման վրա, 18.02.2022թ. թիվ 26/26-1/2912-2022 գրությամբ նախաձեռնել է «ԷՍ ԸՆԴ ԷԼ ՏԵՔՍՏԻԼ» ՍՊԸ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. «ԷՍ ԸՆԴ ԷԼ ՏԵՔՍՏԻԼ» ՍՊԸ-ի կողմից ներկայացված փաստարկները և դիրքորոշումը.

«ԷՍ ԸՆԴ ԷԼ ՏԵՔՍՏԻԼ» ՍՊԸ-ի կողմից ՀՀ գնումների հետ կապված բողոքներ քննող անձի սույն որոշումը կայացնելու օրվա դրությամբ գրավոր դիրքորոշում չի ներկայացվել:

«ԷՍ ԸՆԴ ԷԼ ՏԵՔՍՏԻԼ» ՍՊԸ-ն, պատշաճ ծանուցված լինելով ՍՑ-ՆԳ-2022/75 ընթացակարգի շրջանակներում 25.02.2022թ. ժամը 09:40-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

3. ՀՀ աշխատանքի և սոցիալական հարցերի նախարարության կողմից ներկայացված փաստարկները և դիրքորոշումը.

ՀՀ աշխատանքի և սոցիալական հարցերի նախարարությունը, ՀՀ ֆինանսների նախարարությանն ուղղված 11.02.2022թ. թիվ ՍՄ/ԿԲ-4/3498-2022 գրությամբ, հայտնել է հետևյալը.

«Տեղեկացնում եմ, որ Աշխատանքի և սոցիալական հարցերի նախարարության ենթակայության ք. Երևանի և Արարատի մարզի Նոր Խարբերդ համայնքի պետական ոչ առևտրային կազմակերպության 2022 թվականի կարիքների բավարարման նպատակով հանդերձանքի և անկողնային պարագաների կենտրոնացված կարգով՝ «Էլեկտրոնային աճուրդ» գնման ընթացակարգով ԱՍՀՆ-ՊՈԱԿ-ԷԱՃԱՊԶԲ-22/8-ԵԽ ծածկագրով գնման ընթացակարգի շրջանակներում «ԷՍ ԸՆԴ ԷԼ ՏԵՔՍՏԻԼ» ՍՊԸ-ն առաջին տեղ զբաղեցնող մասնակից է հանդիսանում: «ԷՍ ԸՆԴ ԷԼ ՏԵՔՍՏԻԼ» ՍՊԸ-ի ներկայացված հայտում բացակայում է իրական շահառուների վերաբերյալ հայտարարագիրը, օրենսդրությամբ սահմանված կարգով տրվել է շտկման հնարավորություն, սակայն չի կատարվել շտկումը:

Հիմք ընդունելով ՀՀ կառավարության 04.05.2017թվականի N526-Ն որոշմամբ հաստատված «Գնումների գործընթացի կազմակերպման» կարգի 45-րդ կետի պահանջները, «ԷՍ ԸՆԴ ԷԼ ՏԵՔՍՏԻԼ» ՍՊԸ-ին գնումներին մասնակցելու իրավունք չունեցող մասնակիցների ցուցակում ներառելու գործընթացը նախաձեռնելու նպատակով, Ձեզ եմ ներկայացնում վերոնշյալ գնման ընթացակարգին վերաբերող փաստաթղթերի փաթեթը»:

Պատվիրատուն, պատշաճ ծանուցված լինելով ՍՑ-ՆԳ-2022/75 ընթացակարգի շրջանակներում 25.02.2022թ. ժամը 09:40-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ՆԳ-2022/75 ընթացակարգի քննության համար էական նշանակություն ունեցող փաստերը.

ՍՑ-ՆԳ-2022/75 ընթացակարգի քննության համար էական նշանակություն ունեն հետևյալ փաստերը.

1. ՀՀ աշխատանքի և սոցիալական հարցերի նախարարության կողմից «ԱՍՀՆ ենթակայությանը հանձնված պետական ոչ առևտրային կազմակերպությունների ք. Երևան և Արարատի մարզի Նոր Խարբերդ համայնք 2022 թվականի կարիքների համար՝ հանդերձանքի և անկողնային պարագաներ»-ի ձեռքբերման նպատակով հայտարարվել է «ԱՍՀՆ-ՊՈԱԿ-ԷԱՃԱՊԶԲ-22/8-ԵԽ» ծածկագրով էլեկտրոնային աճուրդ (հետայսու նաև՝ Ընթացակարգ), որին մասնակցելու նպատակով, ի թիվս այլ մասնակիցների, հայտ է ներկայացրել «ԷՍ ԸՆԴ ԷԼ ՏԵՔՍԻԼ» ՍՊԸ-ն:

2. Ընթացակարգի գնահատող հանձնաժողովի 09.02.2022թ. նիստի թիվ 2 արձանագրության 3-րդ կետի 3.1 ենթակետի համաձայն՝ Ընթացակարգի գնահատող հանձնաժողովն արձանագրել է, որ «ԷՍ ԸՆԴ ԷԼ ՏԵՔՍԻԼ» ՍՊԸ-ի հայտում իրական շահառուների վերաբերյալ հայտարարագիրը բացակայում է, այնուհետև՝ արձանագրել է, որ Ընկերության կողմից չի կատարվել համապատասխան շտկումը:

3. Նույն արձանագրության 6-րդ կետի 6-2-րդ ենթակետի համաձայն՝ Ընթացակարգի գնահատող հանձնաժողովը որոշում է կայացրել «ԷՍ ԸՆԴ ԷԼ ՏԵՔՍԻԼ» ՍՊԸ-ին պայմանագիր կնքելու առաջարկ ներկայացնելու վերաբերյալ:

4. ՀՀ աշխատանքի և սոցիալական հարցերի նախարարությունը, ղեկավարվելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 45-րդ կետի դրույթով, Ընկերության տվյալները՝ համապատասխան հիմքերով, լիազորված մարմնին ներկայացրել է 11.02.2022թ.՝ թիվ ՍՄ/ԿԲ-4/3498-2022 գրությամբ:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 18.02.2022թ. թիվ 26/26-1/2912-2022 գրությունը, ՀՀ աշխատանքի և սոցիալական հարցերի նախարարության 11.02.2022թ. թիվ ՍՄ/ԿԲ-4/3498-2022 գրությունը՝ կից փաստաթղթերով, գործով առկա նյութերը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագրի կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Այսպիսով՝ Ընթացակարգի հրավերի 1-ին մասի 8-րդ կետի 8.2, 8.9, 8.11 և 8.15 ենթակետերի համաձայն՝

8.2 Էլեկտրոնային աճուրդը սկսվում է հայտերը ներկայացնելու վերջնաժամկետը լրանալուն հաջորդող աշխատանքային օրը՝ 2022.01.13. 15:30-ին: Եթե աճուրդը սկսելու

օրը համընկնում է ոչ աշխատանքային օրվա հետ, ապա աճուրդը սկսվում է տվյալ օրվան հաջորդող աշխատանքային օրվա նույն ժամին: Աճուրդ չի կարող կազմակերպվել ոչ աշխատանքային օրերին կամ աշխատանքային օրվա ժամը 16:00-ից հետո:

8.9 Աճուրդն ամփոփվելուն հաջորդող աշխատանքային օրը հրավիրվում է գնահատող հանձնաժողովի նիստ, որի ընթացքում

1) գնահատվում է առաջին տեղը զբաղեցրած մասնակցի կողմից ներկայացված հայտում ներառված փաստաթղթերի՝ սույն հրավերին պահանջներին համապատասխանության հանգամանքը.

2) մերժվում են մյուս մասնակիցների հայտերը:

(...)

Գնման ընթացակարգի չափաբաժինների քանակը յոթանասունհինգը չգերազանցելու դեպքում **առաջին տեղը զբաղեցրած մասնակցի հայտի գնահատումն իրականացվում է գնահատող հանձնաժողովի հրավիրված նիստերը սկսելու օրվանից հաշված տաս, իսկ գերազանցելու դեպքում՝ տասնհինգ աշխատանքային օրվա ընթացքում:**

8.11 Առաջին տեղը զբաղեցրած մասնակցի հայտի գնահատման արդյունքում սույն հրավերի պահանջների նկատմամբ անհամապատասխանություններ արձանագրելու դեպքում, ներառյալ երբ ՀՀ ռեզիդենտ հանդիսանալու պայմաններում մասնակցի կողմից հայտով ներկայացված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, **հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին համակարգի միջոցով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:** Առաջին տեղը զբաղեցրած մասնակցին ուղարկվող ծանուցման մեջ մանրամասն նկարագրվում են հայտի գնահատման ընթացքում հայտնաբերված բոլոր անհամապատասխանությունները:

Եթե սույն կետով սահմանված ժամկետում առաջին տեղը զբաղեցրած մասնակիցը համակարգի միջոցով շտկում է արձանագրված անհամապատասխանությունը, ապա վերջինիս հայտը գնահատվում է բավարար և մասնակիցը հայտարարվում է ընտրված մասնակից: Հակառակ դեպքում հայտը գնահատվում է անբավարար և մերժվում, ներառյալ եթե սույն հրավերով նախատեսված է հայտի ապահովման ներկայացման պահանջ և առաջին տեղը զբաղեցրած մասնակիցը հայտով ապահովումը ներկայացրել է բանկային երաշխիքի ձևով, սակայն սույն հրավերով սահմանված ժամկետում չի

ներկայացրել դրա բնօրինակը, իսկ գնման ընթացակարգը Օրենքի 37-րդ հոդվածի 1-ին մասի 4-րդ կետի հիման վրա հայտարարվում է չկայացած:

8.15 Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պարզվիրատուն առաջին տեղը զբաղեցրած մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող հինգ աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ: Ընդ որում, եթե առաջին տեղը զբաղեցրած մասնակցի գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող կամ մասնակիցը սույն հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը, կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Այսպես, ՀՀ աշխատանքի և սոցիալական հարցերի նախարարության կողմից «ԱՍՀՆ ենթակայությանը հանձնված պետական ոչ առևտրային կազմակերպությունների ք. Երևան և Արարատի մարզի Նոր Խարբերդ համայնք 2022 թվականի կարիքների համար՝ հանդերձանքի և անկողնային պարագաներ»-ի ձեռքբերման նպատակով հայտարարվել է «ԱՍՀՆ-ՊՈԱԿ-ԷԱՃԱՊԶԲ-22/8-ԵԽ» ծածկագրով էլեկտրոնային աճուրդ, որին մասնակցելու նպատակով, ի թիվս այլ մասնակիցների, հայտ է ներկայացրել «ԷՍ ԸՆԴ ԷԼ ՏԵՔՍՏԻԼ» ՍՊԸ-ն:

Ընթացակարգի գնահատող հանձնաժողովի 09.02.2022թ. նիստի թիվ 2 արձանագրության 3-րդ կետի 3.1 ենթակետի համաձայն՝ Ընթացակարգի գնահատող հանձնաժողովն արձանագրել է, որ «ԷՍ ԸՆԴ ԷԼ ՏԵՔՍՏԻԼ» ՍՊԸ-ի հայտում իրական շահառուների վերաբերյալ հայտարարագիրը բացակայում է, այնուհետև՝ արձանագրել է, որ Ընկերության կողմից չի կատարվել համապատասխան շտկումը:

Նույն արձանագրության 6-րդ կետի 6-2-րդ ենթակետի համաձայն՝ Ընթացակարգի գնահատող հանձնաժողովը որոշում է կայացրել «ԷՍ ԸՆԴ ԷԼ ՏԵՔՍՏԻԼ» ՍՊԸ-ին պայմանագիր կնքելու առաջարկ ներկայացնելու վերաբերյալ:

ՀՀ աշխատանքի և սոցիալական հարցերի նախարարությունը, ղեկավարվելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի

կազմակերպման» կարգի 45-րդ կետի դրույթով, Ընկերության տվյալները՝ համապատասխան հիմքերով, լիազորված մարմնին ներկայացրել է 11.02.2022թ.՝ թիվ ՍՄ/ԿԲ-4/3498-2022 գրությամբ՝ մասնավորապես հայտնելով հետևյալը.

««ԷՍ ԸՆԴ ԷԼ ՏԵՔՍՏԻԼ» ՍՊԸ-ի ներկայացված հայտում բացակայում է իրական շահառուների վերաբերյալ հայտարարագիրը, օրենսդրությամբ սահմանված կարգով տրվել է շտկման հնարավորություն, սակայն չի կատարվել շտկումը»:

Այսպիսով՝ Կարգի 41-րդ կետով սահմանվում է, որ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: ***Ընդ որում՝ Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում փվյալ մասնակցի հայտը գնահատվում է անբավարար և մերժվում է:***

Այսպիսով՝ գնումների մասին ՀՀ օրենսդրությամբ հստակ սահմանված են հայտերի բացման և գնահատման նիստի ընթացքում Ընթացակարգի գնահատող հանձնաժողովի և քարտուղարի կողմից իրականացվող գործողությունների հաջորդականությունը, ***մինչդեռ՝ ուսումնասիրելով «ԱՍՀՆ-ՊՈԱԿ-ԷԱՃԱՊՁԲ-22/8-ԵՄ» ծածկագրով էլեկտրոնային աճուրդի գնահատող հանձնաժողովի 09.02.2022թ. նիստի թիվ 2 արձանագրությամբ իրականացված գործողությունները պարզ է դառնում, որ Ընթացակարգի գնահատող հանձնաժողովն՝ արձանագրելով այն փաստը, որ Ընկերության հայտում առկա է անհամապատասխանություն և վերջինիս կողմից շտկում չի կատարվել, Կարգի 42-րդ կետով սահմանված պահանջներին համապատասխան Ընկերության հայտն անբավարար գնահատելու և մերժելու վերաբերյալ որոշում կայացնելու փոխարեն, նույն արձանագրության համաձայն՝ որոշում է կայացրել «ԷՍ ԸՆԴ ԷԼ ՏԵՔՍՏԻԼ» ՍՊԸ-ին պայմանագիր կնքելու առաջարկ ներկայացնելու վերաբերյալ, այնուհետև՝ առանց Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու, Կարգի 45-րդ կետի համաձայն՝ 11.02.2022թ. թիվ ՍՄ/ԿԲ-4/3498-2022 գրությամբ Ընկերության փվյալները՝ համապատասխան փաստաթղթերով, ներկայացրել է***

**լիազորված մարմինն՝ Ընկերությանը գնումների գործընթացին մասնակցելու իրավունք
չունեցող մասնակիցների ցուցակում ներառելու նպատակով:**

Վերը շարադրված փաստական հանգամանքներով պայմանավորված՝ գտնում եմ, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված պատասխանատվությունը չի կարող վրա հասնել և հանգեցնել «ԷՍ ԸՆԴ ԷԼ ՏԵՔՍՏԻԼ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 18.02.2022թ. թիվ 26/26-1/2912-2022 գրությամբ «ԷՍ ԸՆԴ ԷԼ ՏԵՔՍՏԻԼ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ

